

UNITAT D'ARAN

R-9334

BOLETIN INTERN DETH PARTIT NACIONALISTE ARANES

TA US EXCLOSIU DES MILITANTS No. 2 Abriu 1.990

UNITAT D'ARAN

Era Junta Nacionau de U.A. s'amasse de forma ordinaria un viatge per mès, entà tractar es diuersi aspèctes de actualitat dera politica aranesa. An començat a foncionar de ua forma plan efectiua es Juntas Locaus de Pujòlo, Arties, Vielha e Les.

Actuauments auem un tèma prioritari, era Lei d'Aran. Eth President d'U.A. a adreçat ua carta a toti es militants entà animà-les a préner ua posicion activa entà conseguir ua Lei que mos sigue digna e operatiua coma pòble. Eth nòste interlocutor en Parlament ei er Intergrop Parlamentari en Defensa d'Aran qu'amasse a toti es Partits dera oposicion, e que siguec constituït a instància d'Unitat d'Aran. Eth Secretari Generau d'U.A. i e continuaments en contacte entà assegurar era Lei que mos cau o lutar per era. Dus aspèctes cau arténher ena aprovacion d'aguesta Lei: que dongue era autonomia suficienta entà Aran entà permeté-li desvolopar era sua personalitat, e que assegure era autogovernabilitat deth pòble aranes. Era Junta Nacionau s'ocupe prioritariaments de hèr es accions necessaries entà arténher aguesti fins.

ERA MAJORIA DE CIU EN AJUNTAMENT DE VIELHA ESTOFE QUANSEVOL POSSIBILITAT DE DESVOLOPAMENT DERA ESTACION DE ESQUI TUCA MALL-BLANC

En un corios jòc deth si e deth non, es senhors de CiU que per boca deth sòn portaveu, eth senhor Jusèp Calbeto s'avantaue de defensar e potenciar era iniciatiua privada, e que es contròls que er equip d'Unitat d'Aran exercie ena passada legislatura sus Tuca, èren un des arguments d'atac as nòsti òmes, non an segut capaci de mantier eth diàleg, difícil mès possible e possitiu, que es nòsti mantingueren, ne an segut capaci de mantier dubèrta era estacion, e non parlen sonque d'instar era falhita, arrebatar era majoria, municipalisar o expropiar. A on son eth repècte ara iniciatiua privada e ara libertad d'empresa?.

E tot açò desbrenbrà-se que er ajuntament a un doble papèr quan tòque er ahèr de Tuca, pèr un costat represente ath 49% des accionistes e a de comportà-se coma un accioniste defensant es interèsi dera Sociedad, tant coma pogue, e per un aute coma Ajuntament a de defensar es interèsi de tota era comunidad, maridar es dues cases non ei fàcil, Unitat d'Aran ac hec.

Non comprenem coma un polític que practique ua politica urbanistica de manja ampla, que a permès es maximes densidats edificatiues en toti es parçans deth tèrme, fòrça viatges ath límit dera illegalitat, d'auti ena pròpia illigalitat (clòses - chalet deth camin deth solan de nau en Vielha) non comprenem que sigue tant de pontilhós en facilitar a Tuca Mall-Blanc ua licencia qu'es normes contèmpnen, e que pòt representar era continuitat d'ua activitat vital entath municipi, non comprenem tampòc que vulgue amparà-se ena unanimitat en aquest ahèr quan totes es decisions son preses unilateralment sense compdar entad arren era opinion dera oposicion e darrèraments enquia se les nègue eth dret a parlar.

Compreneriem era actitud de CiU en Ajuntament s'apliquèse en es sòns plantejaments urbanistics, critèris restrictius e nautaments formalistes.

Mos demanam tanben se açó que ara nèguen ara Sociedad Tuca Mall-Blanc l'ac daran dempús a quauque grop econòmic o de presion mès propèr as sòns dirigents, cercant logicament arguments entà vesti'c, eth temps mos darà era contestà. E en tot cas eth Sr. Calbeto e eth sòn grop an era responsabilitat de decidir entà ben e entà mau, se s'enganhen o òbren de mala fe les calerà demanar responsabilitats.

UNITAT D'ARAN EN EUROPA

Es darrères declaracions de dirigents deth nòste Partit demanant ajuda deth Parlament Europèu tar ahèr dera LEI D'ARAN, respòn ara linha des intervencions que eth nòste Secretari Generau realisèc en congrès deth partit Entau País, ena ciutat de Pau. Aquest congrès amassèc a representants des partits vascos, Euskal Batasuna e Eusko Alkartasuna, as aragonesi deth P.A.R. e Xunta Aragonesista e ath Catalan E.R.C. ademès deth partit Occitan.

Unitat d'Aran deishèc en aqueth acte constancia dera actuacion imperialista e colonisadora, de CiU, un partit que vò auer ath delà des frontèras ua imatge demòcrata e europeïsta. Ací enes sòns dominis cada dia quede mès evidenciada era sua ineficàcia en fòrça ocasions voluntària, qu'està condenant ara cultura e ara lengua deth nòste pòble a desapareisher dejós dera Catalana. Mès ath delà d'aguesta agression capitau ara nòsta identitat es aranesi encara auem de reber eth tufo des actuacions corruptes d'uns politics qu'estan jogant damb es nòstes administracions e damb eth nòste patrimonni a cambi exclusivament deth sòn profit e des sues carrèras politiquas.

Sonque un partit format per gent sense ambicions politiquas personaus, pòt acabar damb aguesta inèrcia de servilisme qu'acabe damb era nòsta dignitat e mos introduís ena corruptèla e er amiguisme, defensen deuant eth Govern Catalan es interèsi deth pòble Aranés.

=====

ER EISH OCCIDENTAU

Des de hè long temps es aranesi entenem a parlar deth famós èish occidentau. Un èish qu'a coma finalitat era permeabilitat des Pirinèus. D'abòrd aguesta question semble pas negativa, sustot s'ac guardam des deth critèri simpliste dera administracion catalana e es sòns representants aciu, d'entèner que comunicacion equivau a progrès.

Ara ben, quan un se met ena pèth det aranés de a pè, e pense que aquest projècte tant defenut peth "nòste" President supòse era desaparicion dera Val (geograficament parlant) dejós d'ua cocha de gondron, que a mès a mès servirà tà pas d'uns immensi camions damb eth sòn corresponent hum e tapatge, er interès d'aguest projècte entath nòste país comence a èster fòrça dubtós.

Ei plan per aquerò que quan un tire deth camishèt, descorbís darrèr der ahèr es interèssi tant luenhans as nòsti, com es dera Camara de Comèrç de Lhèida o es indústries dera perifèria tolosana e a shivau de toti eri, ua politica de CiU que prenen era espasa deth mès fòrt e mos vòlen hèr a creir que son ath costat deth nòste progrès.

Es alternatiues son, donques, plan simples: AUTOVIA entà que passen es auti per a on antes i auie ua Val e i viuie un pòble, o CARRETERES en condicions entà vier entà Aran e poder demorà-i com un lòc a on non i cau anar de pas.

Eth projècte ei encara verd, mès n'i a que se n'estan cuedant de hè-lo madurar e de promocionar es declaracions d'ajuntaments vesins (tant costat espanhòu com francés) ena reclama d'aguest èish. Per tant non podem cap badar e cau èster prevenguts d'aqueri que des de laguens d'Aran defenen uns interèssi que non son es nòsti.

=====